



GARI GARAIALDE / ARGAZKI PRESS

Liburu artean kuxkuxean zebilela, ustekabeen aurkitu zuen wap teknologiaren berri Garaialdek.

Txostenak beren lekuan egon daitezzen

ETORKIZUNeko ESKU TELEFONOA. Urgo garraio enpresak lantokiko datu basea kontsultatzeko aukera ematen duen telefonoa garatu du

Oihana Elduaian | IRUN

Kopa edo oroigarri txiki bat eta 10.000 euro dira enpresaren datu basearekin konektatzen den sakelako telefono bat asmatzearen sari ordaina. Urgo Import Export enpresak nazioarteko garraioan egiten du lan, eta ekonomia digitalerako egokipen onenari ematen zaion Miramon Enpresa Digitala saria eskuratu du, enpresako datu basearekin harremanetan jartzea ahalbidetzen duen sakelako telefono bat egiteagatik.

Asier Garaialde enpresako trafiko zuzendaria eta elementu teknologikoen arduraduna da, baina, batik bat teknologia, elektronika eta informatika gaien zale sutsua. Zaletasun hori medio, Garaialde izan zen wap sisteman oinarritutako programa asmatu zuena. Garaialderen esanetan, onarpena da sariak ekarri duen gauzarik garrantzikoena: «Enpresa txikia izan arren, gauzak egiten ditugula konturatu da jendea».

Beste herrialdeetako jaiegun eta ordutegi ezberdinek arazok sortzen dituzte garraio enpresetan. «Bulegoan ez gaude nean sakelako telefonora deitzen digute, arazoren bat badute edo». Hasieran, espedienteak, txostenak eta antzekoak lantokitik autora, autotik



GARI GARAIALDE / ARGAZKI PRESS

Saria jaso duen telefonoa.

etxera, etxetik lantokira... ibili behar izaten zituzten, bezeroei behar zuten informazioa edo zerbitzua eskaini ahal izateko. Horrela bada, ia oharkabeen eginiko telefono berriarekin arazoa konpondu zuten Irune-ko enpresa txikian.

Neska lagunari eskerrak

Garaialderen arabera, Urgo enpresak bere neska lagunari eman beharko lizkioke eskerrak asmakariagatik: bikotea Aste Santuan Madrilen erosketak egiten ari zela «aspertu» egin zen Asier, eta denbora amatatzeko edo, liburutegi batean sartu eta bertan aurkitu zuen ideia. Beti bezala, infor-

matikako liburuak nahaspilatzen hasi zen, eta wap teknologiari buruzkoa hartu zuen eskutan, ez zeukan «ideiarik ere», zerbait entzuna bazuen ere. Irakurtzen hasi, eta «ttak!» segituan bururatu zitzaion teknologiarekin enpresarako zerbait egin zitekeela.

Donostiara itzuli zirenean, «zuzenean Bilintxera» joan zen Garaialde, wap teknologiari buruz aurkitzen zituen liburu guztiak erosteko asmoz, eta halaxe egin zuen. Handik hiru hilabetera, enpresako langileek ez zuten txostenekin atzera eta aurrera ibili beharrik. Udarako oporretan beste urteetako maleten pisua ederki murriztu zitzaizen, oporraldian estreinatu baitzuten asmakaria.

Erabiltzeko egina

«Gure negozioa ez da teknologia saltzea, garraioa baizik», dio Garaialdek. Printzipioz asmaketa saltzeko asmorik gabe abiatu ziren. Asmakaria bezeroen aurrean «enpresaren be-reizgarri bat» da beraientzat.

Sariarekin batera, sistema saltzeko aukerak ere agertzen joan zaizkie; horrela ez dute asmakaria saltzeko eragozpenik ere: «Proposamen serio bat agertzen bada, begiratu genuke». Beraiek asmakuntza ez zuten saltzeko egin, «erabiltzeko» baizik.

LABURAREN

OSASUNA

Txoriek Ebola birusa garraia dezaketela adierazi dute AEBetako zientzialariek

Ameriketako Estatu Batuetako zientzialariek adierazi dute-nez, txoriak Ebola birusaren bektorerik garrantzizkoenak izan daitezke. Indianako Purdue Unibertsitateko ikertzaileen arabera, Ebolaren kanpo proteinak txoriek garraiatzen dituzten beste gaixotasunen proteinen antzekoak dira. Afrikan ehunka lagun hil dira gaitzagatik. Sukar hemorragikoa eta azala suntsitzea dakartza, eta kutsatzen dituenen %70 hil egiten dira.

GOSEA

Hegoafrikako herrietan elikadura krisia egon daitekeela dio FAOk

Elikadura eta Nekazaritzarako Nazio Batuetako Erakundeak (FAO) Hegoafrikako herrietan elikadura krisia egon litekeela jakinarazi du. Krisiak eragiten dien herriek berehalako laguntza behar dute, bizirik jarraitu ahal izateko. FAO ren arabera, 2003ko apirila arte ez dute uza berririk jasoko, eta ordura arte ere nola edo hala elikatu beharra daukate 16,5 milioi lagunek. Urik eza eta naturaren beste baldintzez gain, hiesak inguruetan duen zabalera ere gosetearen arrazoiatariko bat da.

GENETIKA

Arrozaren genomaren deskodifikazioa amaitu dute ikertzaileek

Iragan apirilean arrozaren mapa genetikoaren zirriborroak aurkeztu zituzten; orain genoma guztiz deskodifikatu du nazioarteko zientzialari talde batek. Hala jakinarazi diote Junichiro Koizumi Japoniako lehen ministroari. Azken emaitza horiek funtzio genetikoaren identifikaziorako, uza hobetzeko eta arrozaren produktzioa handitzeko balioko duten itxaropena agertu dute azterketa egin duten lagunek. Nippon Bare izeneko arroz barietate japoniarra erabili dute ikerkuntzarako.

HIESA

Brasilek Kolonbia, El Salvador eta Paraguairi lagunduko die gaitzaren aurkako borrokan

Brasilek Kolonbia, El Salvador eta Paraguairi lagunduko die hiesaren aurkako borrokan, Barjas Negri Brasilgo Osasun ministroak esan duenez. Urtebetea gaixotasunari aurre egiteko erabili izan diren bitarteko generikoak bidaliko ditu Brasilgo gobernuak, eta herrialdeetako gobernuen lankidetzan jarduteko adituak ere bai. Nazio Batuen Erakundeak jarraitzeko moduko adibidea dela esan du.

IKERKUNTZA

Felix Goñik Ikerkuntzaren 2002 Euskadi saria jaso zuen atzo, Donostian

Atzo arratsaldean Ikerkuntzako 2002 Euskadi saria eman zuten Donostiako Miramar jauregian. Aurtengo saritua Felix Goñi izan da. Euskal Herriko Unibertsitateak eta Ikerkuntza Zientifikoko Biltzar Gorenak elkarlanean sortu berri duten Biofisikako Unitatearen zuzendaria da, eta urte askotako lanarengatik saritu nahi izan dute. Saria Eusko Jaurlaritzako Heziketa, Unibertsitate eta Ikerketa Sailburu Anjeles Iztuetak eman zion Felix Goñiri.



JUAN CARLOS RUIZ / ARGAZKI PRESS

Felix Goñi aurtengo saritua eta Anjeles Iztuetak Unibertsitate eta Ikerketa Sailburua atzo, Donostiako Miramar jauregian.